

# Kata-kata Sakti Pilihan Daripada al-Qur'ān, al-Hadīth dan Hukama'

(Dikumpul, diterjemah dan disusun oleh: Abdul Aziz al-Murshidi)

## al-Qur'ān

Haji (musim haji itu adalah beberapa bulan yang dimaklumi (Shawwal, Dhu al-Qa'idah, Dhu al-Hijjah), maka barang siapa yang diwajibkan haji (yakni pada masa mengerjakannya), jangan melakukan 'rafatha' (mengeluarkan kata-kata yang menimbulkan berahi atau bersetubuh sekalipun dengan isterinya), dan jangan melakukan perkara-perkara yang fasik dan berbantah-bantahan dalam masa mengerjakan haji. Dan apa yang kamu kerjakan hendaklah daripada perbuatan yang baik, nescaya Allah Maha Mengetahuinya. Berbekallah!, Maka sebaik-baik perbekalan itu adalah sifat takwa dan takut kepada Ku, wahai orang-orang yang berakal!).

(Sūrah Al-Baqarah 197)

\* \* \*

Bahwasanya rumah yang mula-mula didirikan (di muka bumi) sebagai tempat manusia beribadat ialah Baitu Allah (kaabah) di Makkah, yang mengandungi berkat dan pertunjuk bagi seisi alam. Di sana beberapa tanda-tanda yang nyata, diantaranya "Makam Ibrahim". Barang siapa masuk ke negeri Makkah, nescaya ia mendapat keamanan. Allah mewajibkan manusia mengerjakan haji ke Baitullah, iaitu bagi orang yang berkuasa berjalan kepadanya. Barang siapa yang kafir (ingkar), sesungguhnya Allah Maha Kaya daripada sekalian isi alam.

(Sūrah al-Baqarah<sup>1</sup>: 96-97).

## al-Hadīth

Daripada Abi Hurairah (r.a) Sesungguhnya Rasulullah (S.A.W) telah bersabda: "Orang-orang yang mengerjakan haji dan umrah itu adalah dua utusan (Allah), kalau mereka berdoa, akan di kabulkan doa mereka, dan kalau mereka meminta ampun, akan diberi keampunan kepada mereka."

(al-Nasa'i)

\* \* \*

Daripada Buraidah (r.a) berkata ia: Telah bersabda Rasulullah (S.A.W): "Perbelanjaan dalam musim haji sama seperti perbelanjaan dalam urusan fisabilillah. Satu dirham (yang dibelanjakan) digandakan pahalanya menjadi tujuh ratus dirham."

(Ibn Abi Shaybah).

\* \* \*

Barang siapa yang mengerjakan haji, ia tidak mengeluarkan kata-kata yang buruk (mengumpat, mencarut dan sebagainya), dan tidak pula ia melakukan pekerjaan-pekerjaan yang fasik, akan dikembalikan seperti hari dia dilahirkan oleh ibunya.

(al-Bukhari).

### Keterangan gambar kulit:

Pemandangan umum di padang Arafah, pada hari sekalian para jemaah haji yang terdiri daripada berbagai-bagai bangsa dan warna kulit sedang wukuf pada 9 hari bulan Dhu al-Hijjah setiap tahun.

## Hukama

Di antara hikmat yang terkandung di dalam ibadat haji ialah: Menanamkan semangat persamaan dan menghapuskan perasan hidup berkelas-kelas di dalam masyarakat Islam yang berdasarkan keadilan.

(al-Shaykh Muhammad Hafiz Sulaiman).

\* \* \*

Dinamakan "Hari Raya Haji"

"Aidil Adha" ertinya "Hari Raya Korban" kerana memperingati pengorbanan (penyembelihan) Nabi Ibrahim terhadap seorang anak yang paling dicintainya iaitu Saiyidina Ismail ('alayhi *sallam*), demi kerana patuh dan taat kepada perintah Allah *Subhānahu wa Ta'ālā*.

(al-Shaykh Syed Khalil al-Jarahi).

\* \* \*

Jika sekiranya setiap ibadat Islam itu mengandungi beberapa hikmat yang besar dan mempunyai tujuan-tujuan yang tinggi mulia, maka haji juga adalah satu ibadat yang meliputi segala hikmah besar dan tujuan-tujuan yang tinggi mulia sebagaimana yang terdapat di dalam lain-lain ibadat kerana tujuan utama ibadat haji itu diwajibkan ialah untuk membersihkan noda dan dosa orang-orang yang mengerjakannya, menambahkan perasaan takwa, memimpin seumum manusia kepada jalan kebaikan serta merintis jalan menuju ke arah perpaduan seluruh umat Islam.

(al-Shaykh Muhammad Ali Abu al-Rus)

<sup>1</sup> Surah yang sebetulnya adalah *Sūrah Āli 'Imrān*.